

每週經課朗誦經文(巴克禮台語漢字)2014/02/09

共同經課 - 1 以賽亞書五十八章一節~九 a 節

1 你著大聲喉叫，毋通限止；出大聲，親像歎哨角。對我的百姓講明in的過失；對雅各的家講明in罪惡。2 in日日尋我，歡喜知我的道路，親像行義的百姓，無離開in的上帝的法律，in求我照公義的審判，歡喜親近上帝。3 in講：阮禁食，你啥事無看見？阮刻苦阮的心，你啥事毋知啊！看啊，恁禁食的日猶久家己安樂，強迫人給恁做苦工。4 看啊，恁禁食，是欲相爭，相冤家，用兇惡的拳頭拇拍人。恁今仔日禁食，袂會互恁的聲聽到頂面。5 此款禁食豈是我所揀、互人刻苦伊的心的日嗎？豈是互人俯頭親像蘆竹，用麻布及火灰舖佇伊的身軀下嗎？這豈通稱做禁食互耶和華所歡喜的日嗎？6 我所揀的禁食豈毋是解開兇惡的索，解放背軛的索，互受制壓的得著自由，損折一切的軛嗎？7 豈毋是將你的米糧分互枵餓的人，將四界流的喪鄉人接納佇你的家，看見褪腹裊的人互伊穿，對家己的骨肉亦無閃去匿嗎？8 按呢，你的光欲發出親像天光早的光；你的傷欲緊緊得著好。你的公義欲行佇你的頭前；耶和華的榮光欲做你後面的保護。9 彼時你求叫，耶和華欲聽你；你懇求，伊欲講：我佇遮。

共同經課 - 2 詩篇一百一十二篇一節~十節

1 恁著謳唸耶和華！敬畏耶和華，大歡喜伊的命令者，此號人有福氣！2 伊的後裔佇世間的確強盛；正直的人的後代的確欲得著福氣。3 伊的家內有貨物，有錢財；伊的公義存到永遠。4 正直的人佇黑暗的中間，有光為著伊發現；伊有恩惠，有憐憫，有公義。5 施恩來借人者，有福氣；伊受審判的時欲訴明家己的事。6 伊永永無搖拙；義人受記念，直到永遠。7 伊毋驚歹消息；伊的心堅固，倚靠耶和華。8 伊的心自在，攏無驚惶，直到伊看見伊的對敵受報應。9 伊大捨施，伊賑濟喪鄉人；伊的仁義存到永遠。伊的角得著舉起，有榮光。10 歹人看了袂克得，的確咬牙切齒來消滅；歹人的心願欲歸佇無。

共同經課 - 3 哥林多前書二章一節~十二節

1 兄弟啊，我前就近恁，無用深沈的言語抑是智慧，來對恁傳上帝的奧妙。2 因為我決斷佇恁中間毋知別項，只有知耶穌基督釘十字架的若定。3 閣我及恁佇啲的時，是軟弱、驚惶、栗栗慄。4 我所講、所傳的，不在智慧好聽的話，是在佇聖神及權能的闡明，5 欲互恁的信不在人的智慧，是在佇上帝的權能。6 若是阮佇練達的人的中間，講智慧。獨獨毋是此世間的智慧，也毋是此世間諸個欲廢無者、掌權者的智慧。7 是講上帝奧妙中的智慧、前所隱密的，就是上帝佇萬世代以前所代先定著互咱得著榮光的。8 此個智慧此世間掌權者無一個知，若知，就無將榮光的主釘佇十字架。9 是照所記載講：目睷未曾看見，耳孔未曾聽見，人的心未曾想著的，就是上帝為著疼伊的人見若所備辦的。10 若是上帝有用聖神給咱顯明伊，因為聖神透徹萬事，及上帝的深奧。11 今人的事若毋是伊家己的神，別人是誰會知？按呢，上帝的事，若毋是上帝的神，也無一個會知。12 若是咱所得著，毋是世間的神，就是對上帝來的神，欲互咱知上帝所白白賞賜咱的。

共同經課 - 4 馬太福音五章十三節~二十節

13 「恁是地上的鹽。鹽若失味，欲用甚麼互伊鹹？後來無路用，不過穴佇外面，互人調踏若定。14 恁是世間的光。城起佇山頂袂會隱密。15 無人點燈，下佇斗下，就是下佇燈台頂，就遍照厝內的人。16 按呢恁的光著照佇人的面前，互 in 看見恁的好所行，來歸榮光互恁佇天裡的父。」17 「莫得拍算我來是欲廢無律法抑是先知。我來毋是欲廢無，是欲應驗。18 因為我實在給恁講，就到天地廢無，律法的一點一畫亦決斷袂廢無，到攏總成。19 所以，見若毀壞諸個誠命至微細的一條，續按呢教示人的，佇天國欲稱伊做至微細。獨獨見若行續教示人的，佇天國欲稱伊做大。20 因為我給恁講，設使恁的義無贏過經學士及法利賽人的義，決斷袂得入天國。」